



七十二峰足徵集卷四十四

武峰吳定璋友篁菟錄

屏山金

洪錫陳編訂
源崑發

王禹聲

禹聲字遵考號聞溪文恪曾孫萬曆己丑進士官
至湖廣承天府知府承天為興都陵寢湯沐地設
守備太監領衛所官兵數百及三奉祠所丁校數
百維時閹焰甚熾中外一氣陵轢地方有司承奉
稍不愜則備監輒叅去之萬曆庚子遣太監陳奉

收稅於郢奉憑勢貪暴與脩監朋比指蹤奸民誣
鍾祥縣令鄒光弼私利龍王洲產金匿不上聞提
治具獄命在旦夕士民惶惶議集 聖廟共赴其
難備監偵知調兵校分屯捕捉劓刖數人重傷數
十人而以郢人欲殺錦衣欽使非常大變具疏公
遺書力爭具揭內外臺院為士民訟冤畧云夫激
變者由激乃有變今厚誅其變者而曲諱其激者
此何以故也以不持寸鐵乞靈 聖廟者為倡亂
而以刀割生耳鎗傷生顱者為靖亂甚至歸罪于

初變再變者而歸功于三變者此何以故也稅監
牌提縣令置之不問而反誣士民殺縣令稅監夾
打生員若罔聞知而反代稅監殺生負此何以故
也生負承天府之生負百姓鍾祥縣之百姓今不
捕之府不捕之縣而捕之闔不獄之府不獄之縣
而獄之衛此何以故也地保執結取諸七月十六
日士民激變在六月十七日嚴刑厚利倒提年月
該監既有府縣獨無此何以故也刑拷地保責取
諸生鼓噪反狀而出自司房王南準之筆暗藏兵

器欲証生負沈希孟判謀而取自伊隣劉司房之家此何以故也伏乞俯念士民激變有因闔豎稱兵無上首正其震驚陵寢之罪毀罵學宮之罪擅調官軍之罪次正其戕殺生負之罪併正職守土無狀之罪生固終焉一壑死亦含笑九原辭氣壯直廷論黷之乃寢杜監奏而有旨謫知府王禹聲知縣鄒光弼為民餘弗問合肥萬振孫有承天士民激變錄新安洪文衡稱公臨變屹然二揭三諭五書心昭日月卒能反危為安有古大臣之烈云

著有白社鵲音附刻文恪公集後

古意

薊北多浮雲雲中下雙鶩願言問雙鶩我征胡不復首蒼青如何靡蕪幾度綠昨暮尺書至將軍出上谷生還未可期歸計焉能卜願此盈尊酒舉之當誰屬有時夢君還倉皇理膏沐夢回明月光依然照孤獨

賦得長安雪

長安佳氣何葱蒨層樓阿閣參差見同雲變黶帝

城頭凜冽西風凝作霰穿簾入戶太輕狂冒棟緣
薨任撩亂夢回蝴蝶晝遽遽凍拆梨花飛片片梨
花蝴蝶淡芳菲點綴寒光上客衣踟躕天外霓裳
舞飄忽空中足練飛萬戶夜疑金闕曙千官寒照
玉珂歸但見朱門皆白屋誰知粉署總黃扉倏忽
冰輪掛疎樾藍田萬頃清光發瑤華直射玉毫寒
素質不隨蟾影沒五侯七貴競良宵浮白呼盧歡
未歇走馬何來輕薄兒瓊瑤碎踏章臺月章臺柳
絮尚縈紆謝女才情今在無窮巷無人間車轍深

宮也自映金鋪何處才人能取酒誰家少婦恰當
鑪都將楚國陽春調付與梁園子大夫

紫騮馬

宛馬久不至驂騮應見稀乍疑烟燧起忽逐電光
飛鳴為胡笳動驕緣塞草肥隴支山下過血汗點
征衣

枕上吟

宦拙俄驚漸白頭途窮興轉寄滄洲寒灰不逐東
風暖歸夢長隨潞水流日落自憐醒對酒春深無

奈獨登樓蕭條旅館誰知己惟有孤衾共敝裘
閒來頻咏舊題詩抵掌猶堪見往時人去赤城空
有賦盟尋白社杳無期歸裝贏得玄經在傲骨惟
應賀監知同好近年零落甚獨操齊瑟欲何之

送同年胡湛宇潯陽視權便道省親

匡廬萬丈鬱嵯峨彭蠡春深旅雁過此去彩衣翻
畫錦遙看紫鳳映鳴珂烟波隱現漁舟晚帆影參
差估客多把臂青衫應濕遍豈堪重聽百勞歌

送鄧翠屏僉憲督學滇南

屈指離觴又送君天涯雁影幾回分鑑懸秋水滇
池月帳動春風闕海雲鞭弭中原誰左席驪黃南
國定空羣點蒼山色青如許賦就還憑驛使聞

月下聞雁

胡雁鳴秋朔氣寒尚依明月到長安應憐毛羽冰
霜悴似訴關河道路難客子音書頻斷絕故園叢
菊半凋殘遙天目送歸飛影知落蘆花何處灘

送同年郭鶴野還朝

仙郎新領度支章儼值應含漢署香十道徵求今

太急好將詞賦托長揚

王晉

晉字研山與吳子喬黃質山為友詩載子喬稿末
東山詩紀錄存一首

嘉禾送宗上舍遊南雍

闕城初日上征衣袖拂吳鉤露正晞馬踏長干春
草細路分樵李越禽稀五經博士爭推席六館諸
生幸接帷此是園橋真盛事素交從此借餘輝

王嘉衡

嘉衡字季銓

分賦大竹山壽吳餘生

漪漪簌簌分湖流吾家子猷應艤舟一碧崛起勢
居右可能斫取為高樓同君歌咏樓之上一尊醉
入南山秋

柳

搖曳何多態離魂處處牽寒生千樹雨晴結一溪
烟彭澤傳幽致章臺繫好緣東風吹不醒長日足
三眠

客窓夜懷羅較書袂次陸公榮韵

檐花落處夜清冷
雨滴虛窗似可聽
香剪愁無披
客枕寒生疑有到
禪扃孤懷青對燈
將暝渴病紅
沉酒半醒好夢尋
歡應不遠
淡梅瘦影拂疎櫺

秦淮社集同吳餘生

年來漂泊江南北也
向秦淮問酒家語到傾心揮
塵尾醉來推手却琵琶
香車滿路爭馳驟
珠箔排空鬪麗華
震澤烟波三萬頃
掛帆歸去訪丹霞

王尊賢

尊賢字汝德幼穎慧有胡僧見之謂其父心山曰
此子異日當成法器宜令讀書弱冠遊庠文有出
塵之想屢蹶場屋遂棄去讀岐黃書能起沉疴汝
德亦體弱多病瀕危輒聞異香枕上時感異夢遂
痊因嘆曰人生寓世而不明無上妙義非夫也於
是專心內典凝神參悟至不知飢寒所著有金剛
經解心經解圓覺經解喫緊問答或矢口成詩皆
有機鋒指點其門生張希明輩梓以行世名曰王
居士天籟集

看劍

慧劍偶塵氛磨洗原無價幾見誤途人撇在西山下

遇達池

倏別已經秋人生如飄絮相見又無言夕陽自西去

月夜獨坐

世界何寥廓虛空不着塵一輪天上鏡偏照有人

立秋

人生深信似蜉蝣每向江邊對水鷗日掩柴扉無客到梧桐葉落始知秋

同吳文台明台遊山

萬花春谷試春衣月下推敲作勢歸詩思不從驢上得目前花鳥盡天機

包山夜雨

高山驟雨瀉洪波蝶夢難成遶薜蘿道是水聲愁聒耳夜深清思逼人多

霧

遠望山頭時不見依稀若有若無中迷人不解其中意捲盡浮翳即太空

王希

希字公晉號知我

顧狷庵席上贈朱枝昌

烟濤雪浪洞庭開秀出君家未易才吞吐雲霞從筆底有無山色與胸垓江淮落落漁舟隱風雨詵詵鳥道來寂寞未酬願殷勤且盡故人杯

王憲度

憲度字輪中

寒食節放舟之莫釐峰

樹色嵐光放眼寬晴波萬頃碧無瀾一百五日隙中過七十二峰鏡裏看遠去孤帆明落日閒飛白鳥襯層巒還思往歲今朝事風送船歌暮雨殘

王武

武字勤中文恪公六世孫居西城柱國故第以諸生入太學淡於仕進博學無方而尤精於畫前太

常王烟客亦善畫猶亟稱之曰近代寫生多畫院氣獨吾勤中所作神韻生動當在妙品中京師貴人慕其名出兼金觀其畫不能得甚有作贗筆以售者內閣宋文恪公德宜其至戚也方貴顯于朝移書招之入京笑而不應間語人曰古之善畫者莫一非高人傑士以文行著者也吾先少傳諸客如沈徵君文待詔唐解元之屬其人皆能為畫重不則畫豈能重人乎晚而自號忘庵或徵其說乃曰魚相忘於江湖人相忘於道術今予之補劓息機

于此也世忘予乎予忘世乎兩相忘則去道近矣嘗以展墓至洞庭好事者持繻素乞畫無虛日潤筆之資輒緣手盡不為問舍求田計也晚歲多病不復多作畫故人有貧乏者強之作便欣然執筆曰聊以佐吾子晨夕需族父年老有孫女貧不能嫁復力疾為作數幅俾鬻以治奩具客有以病諫者曰吾財不足而力有餘敢自愛耶卒年五十有九汪堯峰太史為之傳贊曰吾吳故多高隱之士前明淵孝先生杜瓊石田沈翁頤祖辰子武陸治

叔平之流莫不以善畫有聞流風餘韻迄今為吳人所稱說越百數十年而王先生始繼起先生文章詞翰雖視石田稍遜顧其風尚標致與淵孝子武叔平相伯仲惜乎享年不永而世之稱王先生者又以畫掩其名德予不勝為之太息云

和先少傅靜觀軒詩

蒼狗固微茫白駒何倏忽觀心得長生靜氣歸造物

乙丑中秋將遊故山訪默叔貽適園居先作

芝蘭為寄

芝蘭詎無本靈秀鍾山阿源遠流自長汪洋萬頃波金庭一拳石賴以滋青莎高木各榮暢芳叢匝坡陀燦燦五色芝王香扇微和耳目一何曠雲霞耀盤渦靈氣鬱九秋策杖披烟蘿

題翁養齋教子圖

君家真畫裏故作假山水野馬與塵埃浮生亦假耳滔滔三萬頃一勺坳堂似俯仰輪蹄間趨羶笑蟲蟻何如樂天倫玉樹臨風倚竹韻和松濤琅琅

誦詩禮螽斯衍慶長圖畫須能事為寫諸鳳毛溪
藤十丈紙

寄山中諸叔

去年渡湖御風走片帆抵山不及酉歸來直取水
東道涼氣侵衣月當九今秋人事多纏綿不復閒
情寄詩酒紫蟹黃雞入小春寒濤萬頃精神抖何
當明月青天孤醉倚扁舟出胥口

千頭松產於東洞庭之豐圻夏子東步以小
影屬布景并賦以贈

輕帆渡湖湖水平晚烟落日羣峰明倚楫看雲去
鳥沒不知身已登蓬瀛水在天邊天在水返視吾
軀蟲與蟻西去東馳無日休笑予宛轉浮漚裏烟
火千家荻葦叢山隈蒙密多長松就中百尺何天
矯千頭鱗鬣堆青銅攫霧擎烟自俯仰號風犯雪
經春冬吁嗟乎良材如斯得終保為生岩谷知者
少

題晉賢叔扇頭白蓮

洞庭山水真竒絕况生吾祖人中傑堂構峩峩二

百年太常墨竹森然列可憐諸父善支吾齒疎髮
禿心為枯對酒開軒山翠入讀書携幼雲光徂長
風吹香不知處清氣拂拂繞談塵林木忽沉山雨
來龍腥一陣昏天際君不見城市人日中褰幘追
蹄輪

石公丈人乞寫芝石題贈

我將移家於洞庭之西山飽看烟嵐日日閒采芝
五色爛盈掬白雲出岫隨風還君不見商山老為
成羽翼凋朱顏

新正五日默持叔從山中折梅相過促踐前
約明日即返詩以謝之

吾叔飄然至新梅掛杖頭花開已如此人懶復何
尤乘興輕來往看山易逗留筆牀兼藥裹風便一
扁舟

得月亭在太湖之濱乃八世祖惟道公所建
也西崖李公匏庵吳公各有詩載震澤編秋
夜坐月追和二首

顛氣溟濛一望收蟾蜍分照衆山頭漁燈亂點汀

烟薄木葉高飛鳥樹秋水
上鮫人珠是淚眼前物
態蜃為樓何當早謝風塵
苦龍渚停橈一下鈞

和酉
崖韻

問閭滾滾逐蹄輪何處仙源
可問津兔魄孤懸空
俗慮湖光萬頃著閒人入雲
鴻雁薰葭老矚景蕭

和乾
庵韻

森感慨頻吾祖風流勞想像
亭中恐亦廁前身
畫贈西山劉君賢

消夏灣邊春幾何水風山雨
落花多吾家舊住莫
釐下可許雙橈訪薜蘿

畫桃花別哥寄山中大叔

莫釐峰下太湖濱開到
桃花正好春空谷閉門塵
跡斷但聽鸚鵡語如人

王祚謙

祚謙字益之精於醫理

端陽後一日六虛邀集浴景閣

岑閣涵空明超超迥塵外
登臨邀太虛不負烟霞
債令序忽云遷杯盤豈難
再榴花紅似然柳葉碧
于黛萬頃玻璃光洗出芙蓉
態浮雲勞去來青綠
依然在達者會其源動靜
皆無礙斗酒澆詩魂觴

罷聞天籟主人情思濃山水有攸賴

梅夜

日息無異候當此梅開時孤芳落晶影靜色涵幽
姿初若霜凝際遠疑月在茲杳冥有深會清韻聞
相知

王就學

就學字所敬號翼庵馬蹟之桃花灣人其父死於
盜終身以不得盜為恨每飲酣輒流涕呼天人咸
悲之登萬曆丙戌進士初授戶部驗糧廳主事

官需索甚橫解戶有困斃不得掣批者就學稱引
祖制章兩上卒得著為令旋以東事轉餉徧採見
聞疏可慮者四可乘者三語稍侵執政改禮曹教
習駙馬同卿願憲成雅重之尋調吏部會仁聖太
后梓宮將發上當送之門外先一日有遣官恭代
之命就學愕然即夜具疏其略言皇上之身皆太
后之身也凡可以報恩者何得復顧其身今舉期
在此一刺則憑棺痛踊亦惟此一刺而獨斬板送
以致聖孝不終寧獨非古禮聖心亦何安上領之

終以此得罪未幾削職歸崇禎初起建言諸臣時
就學已卒追贈光祿寺少卿

過內閭訪友

幽谷雲樵信口歌綠陰滿徑繞藤蘿清風竹塢人
烟少白浪魚沙鳥跡多問字不妨頻日至看山還
約幾時過一尊相對開顏笑盡日留連小竹窩

月夜出胥口

月下揚帆出巨川水光一色接長天遠看漁火明
還滅靜聽鴻聲斷復連四面有山剛剩影孤舟無

伴若登仙飄然一葉乘風下瞬息桃源在眼前

王來誥

來誥字仲文吏部翼庵之從孫秉質厚重勤求學
問順治辛卯領鄉薦未及會試卒

山中誌事

此際幽棲別有天茅簷古木薜蘿牽田夫帶雨耕
黃犢蚕女臨風理素綿湖上魚蝦朝作市月中雞
犬夜長眠倘逢壕吏來征稅應訝桃源在此邊

王熙祖

熙祖字文緝號敏齋仲文猶子自幼刻苦誦讀不分晝夜作文刻以寸香而困於童子試年近四十始以五經七義見售旋食餼苦心揣摩力追先輩又閱二十餘年而卒所著有性理彙解行世詩派近擊壤集

見梁燕飼雛有感

紫燕雙雙飼小雛去來上下只須臾可憐雨驟風吹急還自如梭不愛軀

但看老燕哺新雛幾見新雛學義鳥到得來春知

育子生初辛苦記還無

王奕達

奕達字九達武山人丰標俊朗資性敏捷能為小詩及陸博彈碁絲竹謳歌靡不精曉惜天不假年未三十而卒

舟行

作客經旬日舟行過百灣水寒魚性懶村靜鳥歌閒問路花頻落看山雲獨還倚橈凝眺處雙鷺下沙間

秋日送兄

滿目風塵苦臨歧每羨歸人隨秋漸老心與雁分
飛淚洒寒江暮情牽病葉殊別愁聊復慰賴子奉
親幃

過烏衣巷

燕子重來故主非石頭舊壘夢依稀朱門祭戟歸
何處古巷烏衣盡白衣

王世庸

世庸字希績西山圻村人

錦西風

好教素女織流黃膩綠嫣紅媚夕陽莫恃此生偏
衣錦空林昨夜有微霜

蟋蟀

越國曾聞衣錦還西泠非復會稽山式蛙亦是前
人事師相如何愛半閒

促織

聲聲如漏促鳴機斜月流光白板扉飽爵露華音
韻苦拋梭人尚怯朝飢

王需

需字遵時號西庭石公山人康熙壬午舉人

題漁莊兄聽泉圖

阿弟風塵狀難兄山水心蓋顛松似幄揮手瀑為
琴俠骨成高隱孤懷托苦吟泉聲渺何處洗耳少
知音

王奇佶

奇佶字爾份別號漁莊生平足跡半天下交遊甚
廣居京師作聽泉小照名公卿題贈卷軸如牛腰

所最莫逆者陳滄洲沈歸愚兩先生石公山建節
孝祠歸愚作碑記并作西山風土記皆應漁莊之
請也年逾七十手輯石公山志搜討不倦老而好
學有古君子之風焉

丁亥初夏同陳滄洲太守簡霞山明府張近
愚進士宋櫟翁檢討張錫田家不石兩孝廉
豐臺看芍藥

結伴出春明南去二十里野橋渡清流西山矗雲
起尋芳古豐臺碧草印雙履芍藥戎豔友翻翻鬪

紅紫千金重國色何必揚州市留此殿春風欲去
檻還倚羣公志嘉會貴盡洛陽紙

喜晤於在文

竭來混跡金臺畔意氣如君孰有加忽漫相逢俱
是客若為萍聚可忘家清談永日陰移樹對飲中
宵月在花他日如尋具區上石公巖畔有桑麻

題畫

空山霜落變秋容妙墨真能入化工一段蒼涼何
處見薊門風勁角聲中

七十二峰足徵集卷四十五

武峰吳定璋友篁菟錄
莫釐鄭尚忠德傳編訂

鄭階

階字晉之海若之姪貌古行樸好學不怠其於詩
也辨香少陵口誦心維若或見之齋中設木堊題
曰唐拾遺子美杜公之位晨興必肅衣冠而揖之
朔望則致奠或得醇醪香茗佳果必先薦而後嘗
雖旅寓寺居不廢輟也居貧教授里中精于音韻

四聲平仄探喉而出不遺一字著有慎獨居詩千
餘首手繕二帙為族子士期借鈔一夕士期忽發
癩癩舉火焚其廬并晉之稿亦灰燼焉今所傳者
乃其中表許濬所錄而厥孫德昌梓之者僅十之
二三云

飲酒

因病學坐禪因貧欲辟穀唯同賢聖人日日陶清
濁况對佳山水兼之幽花竹友生聚固好自酌不
嫌獨

蟋蟀鳴秋堂冉冉歲云暮若不飲美酒日月舍我
去貧無車馬過老棄琴瑟御唯唱獨酌謠掀髯散
千慮

日日欲出門遑遑無所之飢寒不自謀仰天且吟
詩邂逅西隣友怡然開竹扉置酒留我飲相對寡
言辭

日出京口曉發
遙山掛落月黯淡天將曙鷄鳴水店空孤舟趁潮
去城根鬼火青擊汰流光泝引領探風晴煙霏滿

江樹

江行

日出亂峯紫曉煙飛不起千檣樹裡行船尾東風
死斷岸潮痕落白鳥立沙汀人語識真州高城依
片水

毛公壇

包山路茫昧委蛇履艱澁塢窮覺人語計程將二
十鷄犬隱桃花松蘿遶原隰巖雲白襍襍谷風清
習習振衣躡危磴見石先拜揖仙遊二千載寂寞

壇猶立苔蘚漢時青碑題唐世緝樓觀幸幾存居
人貧亦給傳聞紺毛叟養真羅浮岌木食龍虎馴
道尊山鬼泣胡為乎來斯洞天冥自翕宇宙元一
粟往來特呼吸夜靜湖月高鶴馭必常集攀竹仰
清風曠哉天如笠空餘鍊丹井渴心聊用汲欲去
意猶夷芒鞋帶露溼將希尚子念瑤草定相拾

春日集雨花菴山亭

虛亭倚雲開下瞰南湖渡三點五點帆千家萬家
樹峰迴松葉靜村遠桃花聚老宿六時閒林香三

月暮殘經幽處畢
踈磬吟餘度
裊裊遊絲飛
幻作天花
鶩青陽過嶺
背陰景催暝
酤壘空情有餘
長歌取樵路

秋晚山行

秋蟲變新聲
秋草發幽花
觸處耳目會
豈向他人誇
閒過修嶺間
跬步歷谿谷
銜樵歌
林杪出山背
日西斜
凭虛瞰平疇
煙氣鎖千家

月夜邀禹侯酌臺上得納字

見月思好仇
科頭笑相拉
怡然心不逆
灑灑飛輕

鞞言升雲上
臺高涼坐深
納情曠景逾
爽趣同行自合
但得賢聖親
何煩蔬筍雜
踈鐘動煙樹
夜山紛合沓
天地一蘧廬
古今煩問答
奔星犯河漢
長風下閭闔
却感魏武章
繞樹烏三匝

搗線詞

井水搗線黑
湖水搗線白
約束向前溪
臨流坐隄石
涼風吹蓬鬢
顧影惟自惜
雙臂不停敲
敢辭鮮筋力
歸來幽窻下
撫線思遠客
心淚如可穿
寄君勞相憶

卧佛頌

衆生無一惺何忍獨為覺非是疲津梁示人真寂
學大夢不可返虛空長宵邈縱卧萬劫塵吾觀猶
晦朔

寺居雜言

放形元自縛有若野蠶繭即有外人來禮法先已
遣本懷固簡淡交疎言自淺一笑指秋雲招之落
詩卷

南牕堪寄傲日對此君坐濯濯薰風生醉來枕書

卧雖罹三伏暑反覺百憂破滿月白珊珊照人金
盆大

燈下瓶梅

然此無盡燈照此無根花空幃受香影斗室縣光
華微酣春不寒清卧情寵嘉緬想羅浮境夢中有
人家

同陸貞明寓高峯禪院

趣靜迹偶同不期緣自合遠公容酒徒蕭蕭分禪
榻幽禽時晤言流水如問答陰靄生蒙翳晴巒開

重沓籬落叫花厖松根吠青蛤石林月高立苔徑
雨餘踏晝卧颺茶煙夜吟銷燭蠟相期耐久心優
游終歲臆

雉朝雊

家鷄未鳴野鷄喔風露凄清山月落高原曠隰綠
成帷時帶疾音三嗅作雄雌求偶無嫌猜相喚相
呼即孕胎豈似孤鸞與單鵠旋教獨客感生哀調
羹升鼎廟廊事登木宿芻山野志誰知守介世不
容翻作士人相見贄禽乎禽乎爾何因誰能顧首

不顧身一朝鷹犬相乘後五采文章未足珍

將離曲

攜佳人兮登高山石峻嶒兮路險艱日晡晚兮難
引扳雲漫漫兮水潺潺我有隱憂兮未遑與還空
羨雙鳥兮意自閒溪林杳冥兮霜葉斑目送不見
兮使我涕潛

樓上曙

東方漸高海氣鮮殘魄欲墮嵐光妍灌木千章列
大麓屏山一帶開墟烟酒徒早起頭顱秃寄傲北

窻遙注目飽餐沆瀣神逾清解却宿醒三百斛丹
霞遠映吳江表點點漁帆移樹杪蘋末風生水國
秋樓頭花發湖山曉

浮梁月

浮踪愛踏浮梁月浮梁梁下波明滅幾家虛閣露
風燈無數賈船魚貫列行人漸少月漸高夜山一
片鎖江潮江潮流月入淙去碎雲在天煙在樹

雨後臺上

千山飛雨散一枕受涼新破月亦佳客斷虹如美

人鳥還煙裊寺帆過樹移津小飲從吾好秋聲動
白蘋

過張莊葉君韶寓

秋旻落日遠山色映籬笆重擔收秔稻輕舟繫柳
了豆瓜能上屋鵝鴨自還家流憇衡門下隣人爲
點茶

冬日感懷

五十無聞見鬚眉奈爾何病心歡日少寒色暮年
多慟哭亡羊路淒其叩角歌空庭盟鳥雀不敢說

張羅

懷葛斐仲

爲別柳舒葉相思桂試花書來剛對酒秋到未還
家今夜月千里伊人天一涯此生長契濶期信不
如瓜

旅館莫少陵先生

萬里橋西客五湖天外村依依攜木主落落共匏
尊山水隨情盡禽魚與道存懷公壯遊作曾一過
吳門

醉步南村過允謙復酌

南垞多逸地獨往聽秋聲行野杖橫把出村船倒
撐碧雲寒弄影紅樹晚含情恰有幽人過重沽爲
解醒

寺言

嫋嫋秋風至悠然愜素懷老猶存面目貧直浪形
骸彼佛元無相吾生亦有涯松筠知護法蒼翠滿
蕭絲

陰壑留殘雪幽尋合獨看草香羊性悅林茂鳥心

安跂石吟梁甫瞻雲誦考槃寺煙青一縷歸路暮
光寒

韜光菴

下方擾攘上方幽磴道縈紆古木稠剗竹引泉分
入寺鑿雲開徑就登樓青蔬白飯僧緣重蒼髻紅
塵客念休徙倚北高峰畔立浙江如練抱湖流

東樓雜詠

一樓風雨半春天日假磁甌對聖賢醉裡放懷臻
至境夢中譫語露真詮向隅花樹常含泣占嚮禽

言若取憐禁足泥塗窮巷悄采薪人在溼雲顛
枕高衾薄淡篝燈酒醒詩成正四更沉雨洗心春
斷絕殘花啼夜恨縱橫天涯信去知情重河上人
離惜夢輕衆鳥一呼鳴在竹曉簷餘溜尚聲聲
庭草欣欣積雨披麥秋涼冷薄綿知嬌啼砌蚓元
從潔亂吠鄰蛙各爲私箕子有歌悲故國巴人無
曲和春詞溼雲低樹天垂暮獨嘯高原思正遲
梅凋時候苦陰霾曳杖衡門想日暉野雉獨從山
塢鷺文鴛雙向雨中飛瓶花開盡無生理徑草滋

長有殺機醉裏擊壺歌一闋且燃木火自薰衣
齒殘犬馬血枯心尚得從容勘古今惡食惡衣貧
裡過佳兒佳婦老來珍花間蝶引三生夢樹底蟬
調一曲音世亂歲荒須順受床頭宜酒不宜金
涼風吹樹草堂寬秋雨連山綌布寒與婦說詩翻
致笑弄孫沽酒獨成歡閉眠斗帳筋骸放深閉柴
門耳目安晚色撩人天欲霽兩三歸鳥過簷端
南湖蓴菜北溪芹采采奚童意亦勤虔置案頭供
野老無能天上獻吾君傳聞烽火連閩瘴每見風

濤接楚雲草澤散人憂類杞山穀村釀托沉醺

寺言

佛意西來風日東吾生潦倒處其中杜公竹葉干
秋綠王母桃花幾度紅有夢不愁湘水隔逢人莫
話武陵通當時羨殺輕肥子回首邯鄲故步空
生計惟應命綠尊世情今已近黃昏貧來幸喜無
田地老去猶憐有子孫泯泯泉聲穿竹屋嚶嚶鳥
語入松門浪遊江客歸難晤我有新詩孰與論
斯時只合守菰蘆歲宴衝寒雁背孤前路已知無

鮑子中原寧復有夷吾陶公歸隱存三徑少伯全身託五湖醉語贈君禪似覺梅花開處夢相符五風吹盡屬純陰子半將回刺我心澤國寒光難料理西南日色易銷沉離居自念情非老獨止惟愁醉不深遙望四郊多秃木棲禽無主怨空林

客夜

小閣藏秋夜氣香醉醒相半怯衾涼鐘聲打夢人千里雁語關心月一床行役馬徒趨驛堠亂離金火遍江鄉隱憂耿耿諸喧外卻憶山林歸興長

虎丘泛月同楊姬送葛亮生之白門

遲月移舟水絕塵借山留客夜如春花迴綺路吹香遠酒壓銀塘得政新吉士已希消渴令美人元是莫愁隣歌情未闕還成別願挹秦淮寄一嘖

擬齊梁小體

羅衣貼體涼對鏡儂自傷隻燕守空巢誰知獨棲梁

學織回文錦愁心無已時風吹殘燈滅教儂暗尋絲

湖上

點點春山小片片春帆度帆去忽天涯青山自朝暮

晚嫁娘

擇配阿娘意憐儂翻悞儂及歸時已暮何面向春風

聞鐘

小扣更鐘大扣鏞真言百八本來空牕鳴互唱催人急斷送年華是此中

鄭圃

圃字薇令初名玉琬郡學生與錢吉士徐君和爲舉業之文矩度先民體裁醇正書學二王過得意處可以亂真鼎革後盡焚其制作隱而學圃改今名所居桃源村有地數弓老梅百株遶屋扶疎讀易其中顏曰易圃葉石君云薇令治易以朱程之義必求其盡心焉窮神屏氣以測其微每至終日不食終夜不寢若古人之不聞雷聲不接人聽有疾痛而不知者著讀易緒言一卷推求於天人變

化之理欲自名一家若與程朱爭衡者夫經學之荒久矣自唐有註疏之書說歸於一幾無自得之學程朱氏出盡掃從前講說而精研之邵康節有先天之學伊川異其象數考亭更而純之歸震川嘗云吾怪夫儒者不敢以文王之易為伏羲之易而乃以伏羲之易為邵子之易也震川且然况粗者耶若以象數不足尚則繫辭所云天一地二天三地四天五地六天七地八天九地十何為乎薇令之用心可謂勤且苦矣暮年屬疾蹒跚其足而

此學不能教一世天固靳之耶昔王知遠注易天神以震雷取之不傳于世豈其意耶自古高人畸士或隱于詩酒或樂于山水以遂其意若薇令者藏于一邱一壑矣而猶致意于易想其胸中有一段不可磨滅之氣無從發揮思于易見之而竟不獲遂易有仙道古人徃徃由此而得仙若王輔嗣是也倘薇令結習不除至今猶不捨于爻象占玩之故其與輔嗣周旋洞府亦未可知也至於詩酒山水之興則又淺焉者乎同里有朱羽皇者工五



原件短缺

P12

湖上

暮
點點春山小片片春帆度帆去忽天涯青山自朝

晚嫁娘

擇配阿娘意憐儂翻悞儂及歸時已暮何面向春風

聞鐘

小扣更鐘大扣鏞真言百八本來空牕鳴互唱催人急斷送年華是此中

鄭圃

圃字薇令初名玉琬郡學生與錢吉士徐君和爲舉業之文矩度先民體裁醇正書學二王過得意處可以亂真鼎革後盡焚其制作隱而學圃改今名所居桃源村有地數弓老梅百株遶屋扶疎讀易其中顏曰易圃葉石君云薇令治易以朱程之義必求其盡心焉窮神屏氣以測其微每至終日不食終夜不寢若古人之不聞雷聲不接人聽有疾痛而不知者著讀易緒言一卷推求於天人變

化之理欲自名一家若與程朱爭衡者夫經學之荒久矣自唐有註疏之書說歸於一幾無自得之學程朱氏出盡掃從前講說而精研之邵康節有先天之學伊川異其象數考亭更而純之歸震川嘗云吾怪夫儒者不敢以文王之易為伏羲之易而乃以伏羲之易為邵子之易也震川且然况粗者耶若以象數不足尚則繫辭所云天一地二天三地四天五地六天七地八天九地十何為乎薇令之用心可謂勤且苦矣暮年屬疾蹒跚其足而

此學不能教一世天固靳之耶昔王知遠注易天神以震雷取之不傳于世豈其意耶自古高人畸士或隱于詩酒或樂于山水以遂其意若薇令者藏于一邱一壑矣而猶致意于易想其胸中有一段不可磨滅之氣無從發揮思于易見之而竟不獲遂易有仙道古人徃徃由此而得仙若王輔嗣是也倘薇令結習不除至今猶不捨于爻象占玩之故其與輔嗣周旋洞府亦未可知也至於詩酒山水之興則又淺焉者乎同里有朱羽皇者工五

行家言嘗語余曰易道至微妙其要領俱在繫辭
熟讀之自得其理斯言也頗有會心處顧未知薇
令亦見及否

擬古

芳蘭生谷中遂與衆草伍葉短不出草焉能免壓
侮曦陽不到地微雨不及土嘿嘿終歲間安敢增
怨惡嚴冬衆草萎幽花乃自吐不遇同心人終當
老山塢

種園先種麻種果不種花種麻麻可績種花秋食
賒惘惘可憐子傾命爭矜誇結客向燕趙驅車來
京華物情有衰歇世事隨隆汙意氣一朝盡日暮
徒咨嗟

古人歎浮生如夢亦如客客久必思家夢豈常愉
懌欣戚總無端彭殤寢大宅食熊常自肥食蛙常
自瘠志士多苦言疲庸增笑啞苟不採朝榮鮮華
不待夕

東家有醜女顏面如戚施雖貧不自棄修整多容
儀芳澤時在側苴芷常自齋一朝三盥沐皓潔無

纖埃如蘭吐辭氣詳步誠委蛇含貞以待字未肯
輕結襖

懷古

黃虞去我久上遡幾千祀杳如思夢寐邈忽難悉
指天地無終窮古今同一視彈指數千年我獨非
姚姒禮樂半古初文章遂憂齒滔滔等逝波斯人
將何止

孤雲起天末溝水從東流驅車向周道戚戚將焉
求人生有根本貧賤豈所羞啓期行帶索四皓歸

山邱當年常凍餒至死非身謀

田鼓聲逢逢二缶能惑鐘執德苟不固一肯迷西
東君子秉高操咫尺非所崇細泉不到海蔓草靡
秋風膏梁與醉夢千古灰英雄

送路安卿歸廣平

人生貴知已知已良復難王陽昔未登貢公冠不
彈我家本吳會君去歸邯鄲相去二千里孰能生
羽翰今日不盡歡他日徒長歎

惜別未忍言嚴裝已頻顧人生非影形安得久相

聚但思後會艱餘年就遲暮惻惻心腸摧遥遥夜
屢寤欽哉各努力相將保貞素

梅下

寒花有幽理靜對則得之古澹不以色高簡全於
枝夜影月半戶水滌雲一池相看無可喻思議恐
支離

東園居雜咏

谷口先人業桃源舊得名桑麻隨地長村徑逐門
成山色無秦晉年華任變更逃虛三十載修竹滿

前楹

山路荒荒白谿流漫漫清遠原常野燒古墓有春
畊日落漁樵過雲歸煙靄生不嗟身世短欣戚已
忘情

蒿逕入柴門書聲處處聞隣家能治產老子獨談
文懶性違時好冥心喜夜分病中耽習靜筆墨苦
紛紛

遐想矚雲壑中園起土臺未能過樹杪已得見山
隈暴日松垂影乘風月近杯杖藜時一坐便覺遠

情來

莫釐天外矗直下是三茅峰頂圓如笠巖阿抱似
稍小園當谷口破屋近梅梢縱有蒲輪至雲山不
用朝
木落蒼山近天晴鷹隼高閒行舒倦目負手聽松
濤寒菜青依壠牛羊白散臯山池乾旱久灌溉豈
非勞

追維百事誤自喜獨無名白髮容疎放青山任耦
耕道存天地闊意得死生輕門外無車馬寒溪一

派清

包山寺

數里松杉路群峯擁石樓地偏清磬寂僧少法堂
幽翠竹無三伏丹楓有九秋何時同素侶高枕聽
泉流

壬寅夏五次歸玄恭寓居荒圃韻

小園當谷口修竹出雲端鳥向花間聽山從枕上
看時危生計拙地僻野情安臥起無多事斜陽隔
遠巒

送友遊燕

山林春色好遊子憶神京囊底無長物胷中有不平雁門秋自早龍口月徧明莫上燕臺望徒深千古情

山居

山居不羨五侯過偃仰欣看美蔭多溪暖夜深魚跳子桐陰晝永鶴教雛好風竹樹閒蔬圃微雨郊原長綠莎三十五年徒夢夢許渾從此老漁蓑

路安卿讀書寺中

寥泚秋光何處尋山中雲物自蕭森淒其不到野人夢節序能驚壯士心鐘定月高山鬼嘯夜涼風細草蟲吟孤懷酒醒空騷屑一點禪燈擁布衾

初夏

急雨迴風動晚眠葛衣初試喜涼天盡翻盆盎儲梅水欲焙琴書養木煙世亂關情惟盜賊家貧屬望是豐年牆頭適共鄰農語莫負頭時時蚤田翩翩獨對美人花猶喜春風日影賒年少但思裘馬樂中原誰問鼓鞞譁山川亂後歸茅屋文物清

時憶永嘉蓬鬢只今傷老大不知何處羨魚蝦

夏日汪魏美侯若孩路安卿集竹亭分韻

碧柳蟬嘶雨後風山中烏鵲不驚弓尊前峙壘看
君輩局外分權敗乃公鷺鴨池塘蒲稗綠雲霞亭
榭夕陽紅一年幾許能沉醉又見梧桐月在東

寄同岑和上

相逢桃李正芳妍忽對西風意惘然時事向人常
掩耳病魔賺我只高眠看雲湖上心期杳拄杖峰
頭落照懸欲問橘香香又近不知清磬與誰傳

和吳不官秋日感懷

老去無能萬慮空畫眉那比少年工衰殘身世霜
前柳零落心情井上桐幾處荷衣催夜雨百年茅
屋破秋風滔滔江漢稱南紀誰使狂瀾不向東

冬日雨中

不將煩惱送餘年易圃先生不似前頭暈尚思尋
好句眼昏猶自檢殘編鋤瓜織屨隨高士泛宅浮
家憶散仙若使沉疴能去體定驅鷄犬入雲烟

病中作

偶然攬鏡辨形容正合清癯山澤中脚氣久拘思
惹苴頭毛不櫛類蒿蓬當今世界存皮骨我亦心
情喜晦蒙理學直從高閣置但看花鳥坐春風
海若世父贈余園居詩意謂林泉足樂號啼
可免次韻解嘲

舉足今堪投者稀歸來懸鋏掩雙扉囊錢已為收
書盡欲買花栽又典衣

陋巷蕭條剝啄稀猶煩明月到柴扉空庭何以勞
銀魄獨自歌翻金縷衣

鄭逸

逸字遺民薇令之姪能為小詩薇令死哀其集與
許致遠訂而梓之者遺民也

村暮

落日高低樹歸鴉遠近村湖春流拍岸草暗綠侵
門蝶夢酣花氣人愁戀酒尊遙憐故園月此夜黯
銷魂

秋夜遊來鶴亭

歸憶歸鴻候來遊來鶴亭秋高鳴墜葉水落露遙

汀亂石通幽徑虛檐響暮鈴
摩碑尋舊蹟苔蘚似繁星

暮春過翠峯寺晚眺

秋高驚落葉策杖過荒村
小徑循山麓長松夾寺門
野烟籠夕照飛瀑瀉雲根
坐看嵐光合微茫遠岫吞

鄭華晟

華晟字子昌號南邨

恭紀母節

天運有往復世路有陂平
家門通慘變追憶心怦怦
吾父秉異質弱冠露竒英
無祿早凋謝母氏矢堅貞
上有孀大母下遺孤弟兄
兄年纔毀齒晟甫離狹
嬰骨月只四口老穉何憚
憚移居傍舅氏一廬聊寄生
何來珠與桂晨夕苦措撐
辛勤奉滄瀆拮据供葵羹
大母卧床蓐湯藥手自營
養生兼送

死循禮復竭情負土躬畚鍤指血流佳城卯翼兩
孤雛姑息念不萌熬膏勤課讀中宵燈尚明不辭
心力瘁勉望令名成痛念吾母節振觸淚縱橫孝
慈垂懿範芳徽詎能名清操五十載茹荼味若飴
典盡嫁時衣終身服布荆顧慙兄若弟垂老作鄉
氓春暉忍長負寸草未敷榮恭逢 聖天子幽潛
昭光晶鉅典賁蓬華恩綸被里閭敢云報罔極苦
節賴表旌顯揚期後嗣努力振家聲

七十二峰足徵集卷四十六

武峰吳定璋友篁菟錄

堯峯汪 埜笠閒編訂

吳鼎芳

鼎芳字凝父號卍菴居士少喜游俠復作綺語及
壯掃除故習與范東生王亦房黃伯傳費元朗茅
止生葛震父釋道敷實訥結社苦吟靜對身世俱
忘為親刺血寫經畫大士像一百二十軸遇凍餒
者解衣推食以活之心空一切具出世想矣李本

寧序其詩畧曰凝父之先有為洞庭清氣者如思復思德諸公相與鳴一時之盛史氏繼起文獻具在凝父毅然欲振中葉而程先民所為詩去一切儼佻鈎棘寒儉鹵莽陳腐冗俚之病法不隱才采不廢質取態濃淡之間而見巧虛實之際要之清氣二言足以蔽之錢牧齋列朝詩序曰居士為詩蕭閒簡遠有出塵之致與范東生刻意宗唐刊落凡近有披襟倡和集行世一時肥皮厚肉取青媿白之倫望之人人自遠也嘗與東生及予游苕溪

碧浪湖入夾山漾往返二十日風清月白苦吟清嘯僅得七言絕句一首其矜重自愛如此凝父與葛震父稱詩於洞庭皆能拔除俗調自豎眉目震父晚自信不篤頗折入於鍾譚而凝父亭亭落落迥然塵壒之外鄭晉之輓詩云吾山虎峰下孕此一狂者十五好試劔十七能馳馬放浪遊南都千金恣揮洒平康花月隊盡識吳郎哆縱飲得天和俠氣自傾瀉三十學題詩清峻凌孟賈四十悟無生薰脩歸白社隨意寄行蹤面壁作死啞蘊真以

治性萬物為土苴一朝化神奇遨遊廣莫野招魂
誰與續菹露歌空寫遙想古茗陰悲風動蘭若合
觀三公之詞可以得其真矣及為僧稱庵覽香公

古別離

迢迢去故里耿耿天一鄉征車無淹軌日暮多悲
涼為歡有睽隔別後焉可量潛魚樂深藻鳴蟬抱
枯楊還期何浩浩會面苦不早愁思從中來臨食
不能飽坐令西日徂容華歇芳草風霜載前途歲
月期自保

春曉曲

梨花暖乍勻門
日貼重垣嬌鶯時一
轉惆悵不成眠芳巾
熒淚點簾幕自沉沉東風動
深淺

三婦艷

大婦理膏沐中婦啟房櫳小婦獨無事但問落花
風良人且安卧東牆日未紅

靈峰山房夜起

寥寥青蓮宇出步夜方永蟬鳴四山秋鹿飲一潭

治性萬物為土苴一朝化神奇遨遊廣莫野招魂
誰與續菹露歌空寫遙想古茗陰悲風動蘭若合
觀三公之詞可以得其真矣及為僧稱唵覽香公

古別離

迢迢去故里耿耿天一鄉征車無淹軌日暮多悲
涼為歡有睽隔別後焉可量潛魚樂深藻鳴蟬抱
枯楊還期何浩浩會面苦不早愁思從中來臨食
不能飽坐令西日徂容華歇芳草風霜載前途歲
月期自保

春曉曲

梨花暖乍勻門外香塵滿曉日貼重垣嬌鶯時一
轉惆悵不成眠芳巾熒淚點簾幕自沉沉東風動
深淺

三婦艷

大婦理膏沐中婦啟房櫳小婦獨無事但問落花
風良人且安卧東牆日未紅

靈峰山房夜起

寥寥青蓮宇出步夜方永蟬鳴四山秋鹿飲一潭

靜圓月當碧空孤塔立無影
花落樹留香竹溪澗亦冷
烟光散如水明星上高嶺

答松上人過訪不值

孤踪石上雲飄忽本無住
門外即青山一瓢向何處
離心寄春草柔艷欲飛去
引領生白煙花落祇陀樹

柳浪溪

山青秋雨後人坐秋風裏
平沙下鷗鷺簌簌動蘆葦
夜半明月光漁舟弄空水

靈源寺夜期朱雲從不至

美人雲壑期禪宮夜無閉
林光忽如拭碧月生雨霽
空色映潭心天香出岩際
山童汲澗響野鶴時一唳
幽意寄晨鐘遙遙自相遞

泊北固山下

夕陽江色遠艤棹潮初退
獨客吟清秋沙鷗冷相對
水氣上城根風聲隱岩背
漁舟載烟火撐入菰茨內

寺夜

林均動蕭槭橡葉走簷際柴門夜忘關山風自開
閉邑邑如有懷遙遙轉無寐佛燈清可依城柝冷
相遞斜月苦近牀嚴霜白滿地

嚴明甫園中

為園剛一畝生事已云足日午聞雞聲炊烟起茅
屋石色秀可食林香暖盈掬相見無寒暄惟言酒
新澆

宿江上

山色下空江江光動舴艋霜楓紅不盡已入暮秋

景來雁忽有聲歸雲漸無影醉卧蘆花中月高夢
魂冷

月夜懷東生

雲光吹作水半在湖中央遙看胥母樹葉脫山蒼
蒼美人但高卧不知今夜長

秋懷

枕上聞搗衣月白秋繞屋東家紅淚妾淒淒滅餘
燭閒階隨橡栗野鼠走簌簌風吹斷夢來竟夕不
能續衰鬢伴寒蛩霜花寫心曲

天台山中

白雲伴衾宿開戶雲飛去出戶尋白雲蒼厓濕共
履峰頭異域僧洞口先朝樹流水帶餘花從來不
知處

度嶺

林僧言別去自憇松下石紅泉界空翠巢居叫霜
笛夕光淡西水千頃成一碧冷信雁傳來秋容楓
點出閒雲滿懷袖邀我過山脊

過高峯菴

林迴覺路枉路枉亦自適光風不作寒吹烟半晴
濕澗春多異芳嶺月少行迹犬吠空山雲山僧杖
藜出

虞美人行

營門颯颯驚風雨一片楚歌中夜起拔山力盡霸
業空八千子弟淮河水腰間雄劍無精光神龍幻
作魑魅語美人宛轉其奈何啼痕盡染征袍紫請
從劍下化香魂花枝肯倚秋風主妾心不作青山
雲妾身甘作青山土君心若肯報妾身重向江東

整師旅

橫塘秋思

橫塘風起芙蓉委秋月娟娟媚秋水雙燕雙飛有
別離浮雲那得還山期屏山不動簾衣亞自背殘
缸清淚瀉晨雞膊膊烏啞啞霜花凍裂鴛鴦瓦

廢墓歎

廢墓鼓荆榛下有妖狐穴哀菟泣杜鵑化作楓林
血頰波聲斷夕陽空傷心莫向英雄說恩亦不堪
酬讐亦不堪雪神仙寂滅天地古世故茫茫幾銷

歌吳王臺上望胥江依然冷浸清秋月

邯鄲枕

君不見邯鄲枕得意功名在俄頃黃糧未熟夢已
醒醒來再拜向老翁可憐淪沒塵埃中三山歸路
渺何處掀髯一笑青天空古今得喪俱草草回首
終南苦不早相看只解說盧生茫茫幾許邯鄲道
飛樓曲戲東茅止生

飛樓宛轉芙蓉簇對列鴛鴦三十六東風著意渡
江來染出蛾眉春水綠樓頭何處得春光非霧非

烟俱可憐紅芳雜
暹錦茵軟塵香不上
雙行纏嬋娟花月
曾無價只向嫦娥乞
長夜夜長夜短那得
分鬱金自繞珊瑚雲
青絲玉壺正傾倒
楊柳烏啼白門曉

樂神曲

蕙凋擗兮瑤席陳
采芳馨兮湘之濱
女紛進兮交舞鳴
笙竽兮雜拊鼓
神之來兮可憑
楓林寂兮秋冥冥
神之去兮容與
江花零兮波瀾
瀾焚靈錢酌桂漿
鴉飛飛空夕陽

清明日泛舟

似晴欲雨養花天
湖中冉冉生白烟
波光夾岸綠無際
買得偏舟春可憐
可憐最是清明節
青青踏露盈盈襪
陌上漸歌桑渡頭
仍弄楫燕燕正飛來
鶯鶯啼未歇幾樹
啼鶯歌更啼幾家
芳草綠初齊橋迴
野渡還官渡路接
山溪又水溪山邊
水邊春風起松花
柳花飛不已春風
搖蕩棹歌前花香
撩亂篷窗底棹擊
空明濺酒衣中流
容與澹忘歸西林
落日東林暝隔水
漁燈映遠扉

秦淮酒樓送顧九疇
秦淮樓下催歸艇樓上雲鬟慵不整綠陰如酒潑
春衫離歌漸短天漸暝歌漸短路正長落花落絮
流晴香晴香流入隔江樹斷雨風吹不知處

天界寺贈田上人

南朝古寺疎林外落莫同師日煮菜羨師愛師痴
絕倫胸次悠然了無礙松風罨牀秋正驕恍疑此
夜眠波濤寒生布被夢無著起來搔首霜天高霜
天月魄淨如水木葉飛來打窓紙晨光欲動晨鐘

鳴屋上慈烏正喧起開門却為青山色青山自青
雲自白竹杖相携爭出門癡師已踞峰頭石

采香涇

柔風吹斷蘼蕪死歲歲春芳付流水西岩尤剝昔
時雲斜陽照出行宮址香魂去不還野鳥愁空山
輕羅綉作苔花斑苔花斑空山冷夜深露泣西施
井里寒山

百花洲

百花洲春草綠春洲水暖鳧鷺浴夜夜城頭烏夜

啼吳儂爭唱吳趨曲

寄趙凡夫

十里寒山路香風正采茶偶隨樵客去一到隱君
家細語生清月閒心托片霞別來湖水濶秋色上
蘋花

晚坐雞山水濱

湖風來不斷石壁浪花生暝入孤雲冷秋歸獨樹
清與僧成野坐酌水了閒情更覺前山靜冷然磬
一聲

飯石峰晚步

白鳥不飛霞雲光和水凝自吟松下路遙見寺中
燈夕爽山無雨春寒澗有冰隔花相問訊月照荷
鋤僧

雨後登虎峰送張七

山雨飛纔歇山雲散已齊林香清一寺草綠過重
溪氣暖梅初熟紅殘鳥不啼夕陽催客去湖口掛
帆低

秋夜同朱十四懷令弟十六

秋色帶檐楹空山夜倍清為歡翻憶別因弟轉憐
兄雨葉晴猶濕霜根水共明經年書一紙曾達石
頭城

泛石湖同篠園居士

放棹秋光遠殘陽湖水西樹團漁戶小山截寺門
低野渡一僧立汀花數鳥啼且沽橋外酒同宿越
來溪

泊舊遊處懷蔣季昌葛稚孫

月暗迷汀棹橋迴見市燈人家相繫處風雨亦來

曾薄醉偏憐夜貧遊轉累僧兩年三竺寺同到不
同登

虎邱

移舟遙見塔石逕轉烟蘿山色出林少茶名借寺
多未秋先候月向晚漸聞歌花市無冬夏遊人雨
亦過

泊松陵懷沈四汝興

垂虹亭畔泊一帶遶漁梁燈影懸秋店歌聲到野
航葉疎風不管水遠月相忘未識城西路尋君夢

亦忙秋風不覺水邊月醉忘未歸燈西窗暮

寺夜看瓶菊

分取東籬色磁餅晚更宜香生携被處艷冷着燈
時夜久僧還對秋深蝶不知若教歡賞地風露正
淒其

三山寺夜望茗上懷吳允兆

只此堪乘興秋風一放船天清皆在水樹冷不生
烟靜極轉忘寐望窮殊可憐書來同所願池內有
青蓮

前溪

野風迎白衲隨步已前溪落日在流水遠山青不
齊花寒聊自躡鳥倦偶然啼何處茶烟起漁舟繫
竹西

破山寺

曉岿隨路轉迤邐蹋花行古壁蛟龍氣空巖風雨
聲佛香清度水鳥路白過城漸覺衣裳潤蒼然海
霧生

沈端伯陸仲飛携酒過碧雲菴

秋色前山好雙扉盡日開卧雲禪侶寂曳竹酒人
來空響生黃葉清陰護碧苔城中同是月不及此
遲回

夏夜雨花臺簡茅大

不少前朝寺鐘聲取次聞三山微雨過遙送隔江
雲夜久涼仍在春歸綠不分坐憐明月近持此報
夫君

金閨夜別費元朗

交從他處定路自故園分有夢難成夜無言可贈

君一燈殘細雨孤橐向寒雲未曉林中葉蕭蕭已
厭聞

歸湖上

西風吹箬笠無恙舊江天白鳥飛破水青山移近
船晚晴楓葉外秋冷荻花邊泊處遙堪指柴門生
野烟

西湖夜泛

疎雨洗空翠來看湖上山斷橋芳柳下小艇白鷗
間月在美人遠春忙流水閒西陵猶喚酒燈影出

花關

雪中過彌勒寺

雪中尋寺遠先得一僧逢無數梅花裏亭亭出古
松濕烟穿破壁野水寂寒春不待前山去風林報
晚鐘

暮投上方寺

暝色投荒寺行盤翠幾層磧花分積雪橋月遞流
冰一宿同僧被孤吟借佛燈曉看山下路濕氣滿
霜藤

林屋山石上遲謝去非不至

曾記林中別相期石上遊亂山空欲暮殘葉已無
秋岸白雲初斷江寒月自流行踪烟水濶何處問
沙鷗

翠峰山居過陳仲醇

仄迳峰陰入青霞拂曙關好閒常住寺無意亦看
山飲鶴空潭上烹泉亂竹間牀頭雲一片飛去不
知還

月夜同劉虛受錢時將

空翠滴松寮庭閒暑自消所期非一度不易是今
宵河淨雨先濯露香風漸飄東家猶未寢花裏喚
吹簫

西湖曉起

殘鐘湖上月杳杳落層岑曉色散為水秋聲聚作
林閒來曾不慣幽處每相尋叢桂南山下晴香一
迳深

和靖祠前晚坐

山翠出林杪祠前芳杜洲孤烟生後暝雙鳥去邊

秋燈影參差水歌聲遠近舟梅花無復主剩有暗
香浮

送張十二之彭城

迴飈欺短褐歲晚欲何之白草但一色黃雲無盡
時城荒圍夜燒渡冷咽流澌盼盼題詩處煩君拂
網絲

懷東生卧病

引領限河水別離常有餘始知三月病那得一行
書已落牀頭葉空懷池上居扁舟相見日雙鬢欲

何如

虎邱僧房尋郭二同諸上人乘月登山

長堤沿短棹轉入翠微灣酒伴秋相集僧寮夜不

閒布袍先受月竹杖早過山何處簫聲起縈迴灌

木間

法海寺訪孟禮席上看落梅

亂雲穿一迳隔竹見雙扉山氣晴猶冷松花翠欲

飛乍逢如舊識偶坐便忘歸風暖花殘雪吹香酒

上衣

發舟

碧靄生春霽村村出浣紗兩行新柳色一意送浮

家野水全欺草紅霞不讓花秦淮今夜月先得聽

琵琶

小院

小院曾行處今來不忍行是花皆黯淡有月未分

明轉覺非前事終憐負此生遙波春一片流恨復

流情

鞦韆月

七十二峯

武山

卷四十六

子夜鞦韆月盈盈似可携乍窺金架冷旋向綵繩
低着露凝芳迳和烟帶綠溪閒情憑柳繫幽夢隔
花迷影度重欄外光殘小院西林鶯繞一疇曙色
在中閨

美女篇

娥睂深谷裏婉戀復嬋娟待月移羅襪因風整翠
鈿雜花香不辨照水影俱憐媚逐迴波處情生欲
語先瓜期頻自惜荏苒一年年

新秋同實慧二僧泛碧浪湖

出郭先瞻塔移舟只共僧山容秋自遠湖色晚猶
澄片石成初席迴風唱早菱斷橋通鷺渚疎柳間
魚罾屢泊依雙樹遲留見一燈松篁如有待亭檻
轉堪凭靜與吟情得涼教酒力勝更憐明月上清
影甯空藤

送雲公北上

直北窮荒路孤遊歲莫天搭衣何地雪乞食幾家
烟投迹雞聲外安禪樹影邊月窺臨水店雲引渡
江船屢說無生法猶存未了緣行行忘曉夕芳草

是新年

七夕舟中懷遐周

柵下橋西路垂楊自繫舟墟烟青忽夜野水淡將
秋新月斜侵樹明河直界樓離心生遠道涼思在
中洲有處初砧杵無家及女牛空成文乞巧書信
著窮愁兀兀篷窓底遙遙葦岸頭所懷如可寄一
葉隔江流

早春同韓求仲王曰常沈虎臣范東生費元

朗遊湖中諸山

春晴風色好十日看山綠野寺花迷月重湖水潑
烟雜香開酒逕空翠接歌船握麈青菰上流杯白
鳥邊荒榛扃古洞怪石島平川醉醒常無定談諧
亦自然柳絲猶拂短荇葉未寒圓坐對殘宵後情
生去路先移家隨處可惟欠買隣錢

曉過湖心亭

漁燈欲滅煙漫漫小舟撐過金沙灘渡頭叢樹擁
秋霽城角片鴻來曉寒圓月隋地白堪拾遠峰出
雲青可餐風前短髮忘盥櫛樵巾一幅凭闌干

秋夜西湖觀妓

藕花相約舞衫輕
油壁初停月正明
黛色低顰秋有怨
釵痕斜溜夜無聲
弱雲已攬難教夢
艷曲纔聞未識名
只恐臨風便飛去
水邊留取襪盈盈

雨花臺送印公之巫山密公之廬山

去路悠悠夕照催
可堪離思共登臺
錫歸西蜀秋剛盡
衲掛東林月正來
晏坐峯頭飛瀑冷
經行峽裏斷猿哀
他時證取菩提果
兩地曇花一日開

秋日閒居東隱公

溪橋南向岸東頭
盡日盤渦到白鷗
黃葉聲中花徑杳
青山影裡竹扉幽
人情似水偏宜淡
生計如雲好耐秋
一自野僧相識後
每因明月上扁舟

宿虎跑寺

濕烟鬱結亂山橫
敲斷鐘聲燈自明
野寺冰霜經晚歲
石林風雨伴殘更
十年一夢浮雲冷
四海孤身落葉輕
願得皈依清淨理
蓮花香裏證無生

雨渡橫涇懷孫惟化

東風作冷石湖船
節屆清明倍可憐
一日客程偏

遇雨幾家茅屋不生烟野田水綠迷楊柳古廟花
深出杜鵑寂莫橫塘人去後吳姬歌舞自年年

哭吳健父

寒日沉沉下遠村空堂寂寂閉黃昏文章命薄誰
知己山水多情即故園一壑荒烟收病骨三更冷
雨送愁魂傷心莫問王孫草幾日春風綠燒痕

柳陳甫墓

古道盤迴向遠岑荒墳悽楚帶長林浮雲已斷還
家夢衰草空餘住世心海色隔城邀暮晷江聲挾

雨送秋陰青蓮後事何堪問幾處情交淚滿襟

閨中曲

客歸青海頭報道單于死曉起望征人新妝從此

怨詞

華屋春將盡紗窗日易昏不知多少恨相見與君

言

秋雨

孤燭自明滅陰蛩若相語夜半小窓前無人聽秋

雨
燈下

野寺十年心無言坐燈下夜半風雨來瀟瀟打破
瓦屋春餘盡
月夜

昨夜因看月清光動旅思今宵宜早睡莫待月明
時

山中竹枝詞

青山是處鎖蛾眉日日湖邊有別離却怪烟波三

萬頃扁舟只許載西施

江南一雪苦非常湖上空餘橘柚鄉萬樹千頭零
落盡于今那得洞庭霜

湖船來往慣風波尾後黃旗飛虎圖一夜王程三
百里枇杷明日進留都

柳枝詞

兩雨風風釀綠深官亭迢遞見晴陰垂條何用長
如許不繫離人一寸心

綠陰如雨萬條斜啼罷朝鶯又晚鴉盡日春風無

別意只吹花點過西家
針樓曲

薄雲纖月露零零碧樹深沉掩畫屏樓上相隨穿
一縷自來樓下拜雙星

青谿小姑曲

十五盈盈學解愁珠簾不捲倚篴篥多情明月無
情水夜夜青溪映酒樓

春游曲

西餘芳草綠新齊亭樹無人繡幙低忽漫好風傳

笑語流鶯飛過杏花西

楊柳依依燕燕飛乍晴香雨點春衣花間記得經
遊處青粉墻頭白板扉

舟中遲錢受之內翰

長塘露白鳥啼樹短棹夷猶歌何處月光併在水
聲中一夜篷窓流不去

尋梅

行盡山厓又水涯亂雲狼籍樹離披不知何處春
來早昨日僧房見折枝

無題

綺疏微透曉光寒欲貼鴉黃展鏡鸞錯怪桃花似
儂面一番風雨便春殘

夢

春風吹夢落誰家鸚鵡分明教點茶斜月一痕人
散後小窗香燼伴梅花

曉過西塢

薄雲和月隋前巒九寺鐘聲送曉寒曲曲清溪行
不盡石橋紅樹待僧看

寄如公

野塘水綠拋香絮夢到晝公焚草屨悄風斜月露
華中一一棲烏自飛去

送景周王孫還豫章

採菱歌斷鴈初聞一幅離帆趁夕曛前路贈君秋
色好大江烟月小孤雲

吳士竑

士竑字咸抑疑父之子

陳君孝招集清涼山醉竹軒同瑞之諸子

結茅倚山根修竹恰成趣暇集憑綠醅佳朋愜幽
素波搖遠近村霜逼離披樹獨鶴不避人花間自
來去

晚過言成禪室

行行路逾遠日暮始投寺林鐘發清響閒僧尚無
睡相見各慰言一月幾迴醉

殘絲曲

殘絲斷續聲悄悄紫塞金閨間昏曉遲回宛轉縱
復橫幾許芳心盡縈遶塵蒙鈿匣雙鸞死憔悴笑

蕩泣秋水屏山不障綃帳寒金徒抱箭巖更起紅
燈隔簾紅影紅亞藥錦花香夢空空堦碎踏纖纖
月方響悠揚颭曉風斷絲續絲化為血援彼瑤華
歌一闋商懷徵怨兮結思多柔情往好兮逝素波
殘絲殘絲兮奈何

蚤春送嚴開一之秣陵

客路消晴雪和風稱薄裝仙鄉瞻句曲山驛過雲
陽草店春缸綠烟花旅服香秦淮金粉地到日滿
新芳

雪後同可南師晚坐懷邱無為

夜半寂無寐披襟對一僧
林寒月翳翳巒失雲層
層簾隙青支竹池空白
滿冰有懷多病客清話再
挑燈

布金寺尋八師不值

頽霞縷縷兼白烟蘋花香
冷秋滿船一條雪水綠
無意幾點吳山青可憐
雲蹤不着浪中寺錫飛
宵作人間緣砧聲近遠
那得寐月明短棹夷猶
還

春潭

春融景物蘓水暖莓苔綠
遊魚自往來獨坐看不
足

送君遠七兄

不次垂楊色迢迢自幾村
春風芳草路好去醉平
原

秦淮夜歸

放棹歸來月將墜隔岸
酒家猶未睡疎疎燈影出
花間隱隱歌聲在烟內

葉青之見過

辛夷落處燕飛飛竹裏茅茨白板扉野客獨來相
訊處滿庭空翠濕蘿衣

吳玄齡

玄齡字季貞賦質清癯服西方教與葛震父鄒舜
五蔣季昌釋可南結清齋社有詩一卷曰清齋社
草癡叔凝父為之序

和趙凡夫先生寒山

寒山有茅屋正在雲深處山人不出山白雲自來
去

耕烟墅

宅臨太湖水秔種太湖田有時向南畝耕破一犁
煙

夏日登碧螺峰

薰風披拂碧螺峰暇日來登信短筇七十二峰青
不斷湖波萬頃浸芙蓉

七十二峰足徵集卷四十七

武峰吳定璋友篁菟錄

岱心劉世禧錫茲合編

葉時蕃

時蕃字仲衍一字羅浮武峰葛震甫稱詩雄視一世而仲衍與邱無爲者則兄事而實師事者也爲詩句琢字追復意象超然其生平佳句膾炙人口如中秋待月云千古有明月一年惟此宵喜僧結龕云烟火不生累松風或可餐答鄭五云宿香吹

夢醒秋氣撲燈陰
閨元宵云到處艷
陽催火樹普天歌
管借花朝泥美人
云石爛山頭終化
艷春深燕啄細分
香皆能刻意生新
不落前人窠白於
震甫吟壇左右足
以拔戟自成一隊
者也

麥秋雨

急雨何繩繩
四月秋甲子十日九日陰
黃雲黑雲死爨濕鳴水蛙
羽重泣朝雉江南歲游
飢草木半爲米官長
異戰國過隣糴不許
天意苟憐時寸晷卽
消弭幸無西北憂
烽火得一洗

春桑陌上行

誰家南陌風正香
采桑女兒艷新粧
春衫拂溪溪水綠
路滑提筐行不于
高枝承露露未晞
皓腕斜攀冷纖玉
驕嘶郎馬東南來
片片桃花葉上開
致詞不語亦不應
空林落日相低徊
明朝更訪叢臺路
難道此心如死灰

雪泊聽隣舟歌聲

北風淅淅溪光冷水
淡淡平煙井何處
嬌喉夜吐聲凍魂
淒斷紅窻影隔面
脂香生縷縷冰蟲
情

癡撲燈死新鶯篷底一教聞風雪滿天春不分

射鶚山

驚波怒雪荒煙寺舊是吳王射雕處鷄城隔水高
我我養鷄不啻如養士有雕睥睨去復來應弦墮
地良竒哉智巧果敏寡儔匹國亡身死令人哀太
阿倒置是非昧民社爲輕鬪鷄貴青山舉鏃落天
飛石室開籠放烏喙煙燼蘇臺鹿走時彈鶚承蜩
矢仍在君不見賢臣爲弓士爲矢到處飲金當沒
羽

雨宿獨秀軒葛震甫夜話

紙窓高濕氣寒淺隔林深雙影孤燈夜三年一雨
心耳殺銷轂响簷溜答蛩吟此際雖堪聽愁邊恐
不禁

賦得雨中紅葉送鄒舜五

野火潑不息濕天應炙晴葉疑霜後失花似雨邊
生碧血當秋洗斜陽逼晚明離眸開不得浦上正
盈盈

雨中送友之武昌

西日猶堪挽君行不少留獨憐今夜雨偏到未眠
舟海氣連官渡秋聲落戍樓未須頻洒淚前去是
江州

煖月阿爲張仲美賦

飛棟危巢接窺臨與夜休不寒非二月無雨即中
秋平楚搖花席空香載茗甌瓦光高片水如坐米
家舟

樹樓爲馬叔明賦

掇翠俯平川樓飛獨樹顛小於蓮葉舫廣倍橘壺

天木處追堯父風眠入鳥禪靈槎吹不去陸地得
栖僊

白門喜逢葛震甫歸自滇南時方病起

微雨照繩床庭除鳥字荒胸懷自寥廓顏面未衰
黃尸祝留蠻貊生逢卽故鄉不須問垂橐長物只
檳榔

暮投烏衣墓

迷離艸色雨如塵夢夢長途欲倦人返照數家江
燕里殘山一騎埜花春紅襟對語前朝客白板斜

連舊日隣我到正逢寒食候隔溪烟火夜炊新

游絲

乍引青驄去酒壚復懸香雨弄珠珠一風拂面調
遊女百尺牽花惹釣徒織露枝間驚蛟蝶颺晴簷
角惱蜘蛛橫斜搖曳春風裡繫得離心半寸無

茉莉

微雪不消暑小星香照眠最奇桃葉渡燈火賣花
天

曹武惠王祠

矢衆爐煙爇至今好生恩澤及人深角崩稽首猶
漂血尚父如知有媿心

別意

輕裝冉冉撥晨涼蟬螭遙天引劍光不住棹歌風
外起布帆一路藕花香

江上見

垂楊艸屋帶溪斜牛背無人立暮鴉小婦笑來漁
網下一瓶春釀餉蘆花

葉繼忠

繼忠字九一竹屋古醜菽水自好靜占天官之曆
閒種山人之花居然名士風流也詩一卷曰谷應
草大致宗眉道人而稍加雕飾者

余山訪眉公先生

落紅香鬢蕪蕪路短笠孤筇破煙霧流鶯啼過東
余岡文翠沉沉滴水榭仰止遙遙一叩關相攜共
坐柳花灣傾珠霏玉殊未竟松月漸高栖鳥閒

惜別行送容所之閩

獨夜空齋書咄咄時覺香風到帘月朝來曳策小

橋東幾點梅花照溪雪徙倚花林未忍回忽聞花
外故人來故人遠作建州客短棹輕帆花底出挽
袂銷魂無限情相呼濁酒對花傾垂垂凍雨鮫珠
瀉寂寂幽香仙珮迎仙珮凌風去鄉國鮫珠和淚
沾衣濕山海梯航須健食莫愁風雪路行難平原
何地無知己臆酒春梓爲解寒

送孔明之之白門因遊武昌

夫君標格自翩翩彩鷁乘潮望若仙燕子掠香簾
外舞芙蓉呈艷鏡中妍飄飄帆影輕於葉衝破長

風浪飛雪撇却家山何處遊秦淮煙水楚江秋竹
枝詞唱三更月桃葉簫吹十二樓客裡聞歌莫住
帆琵琶容易濕青衫空林雨色晴飛瀑煙寺鐘敲
日下崑西風颼颼天際起楓葉蘆花滿江水搖落
江天喧暮鴉可堪回首客天涯歸歟莫讓梅花早
松石山頭酒可賒

登天竺還過九里松

一徑轉深谷出林疑入林晚霞扶落日去馬逆歸
禽壁立天光限雲分瀑影森掩關僧課誦清磬隔

松陰

次施善長寄懷沙美人

咄咄蓬窻底無聊數雁行閒情寄流水幽恨語斜
陽悅短牽絲遠衾餘抱影香夢回看月色疑對好
容光

相期曲次吳凝父

贈郎芍藥與郎期潮到門前月上時郎信不如潮
信淮月明潮落獨相思

朝葉時育

時育字鑑韋羅浮兄弟行也晚年棲心禪誦宛如高座道人獨不廢棋酒以為可以學道可以養生

云

山上舟為張子傳賦

一室渺於芥居然千頃思自非河不廣恰與山相宜帆影動蕉綠濤香生墨池使星千載下仍照古槎枝

吳次圭出自賊中遇于聊城旅舍夜話同賦

臨去幾逡巡間關脅從身蒿萊如有待被擄至荏平縣界夜

陣深蒿之左遂得竄身脫歸

呵護豈無神白草霜邊骨青山夢

裡人問經焚掠處嗚咽不能陳

葉元發

元發字智華鑑韋子也幼能詩亦善弈以奕致病猶指畫不倦與父究心竺典頗得其宗嘗從天懋師問答有物先天地無形本寂寥能為萬象主不逐四時凋問云既不逐四時凋因甚秋來黃葉落答云嶺上孤松山頭明月泠泠澗泉嚶嚶駸駸但恁麼見莫生分別珊瑚枝枝撐着月

七夕有懷

朱明幸息駕虛簷引餘清
火流陽節改蒲柳感吾
生艸木載涼颼梧楸一已零
冥遊天宇淨列宿爛
以盈所居薄江臯銀漢兼有轂
緬彼山中人遙睇
高煙平斯時不遑寐
峰月嫵前楹念我于役苦
風微絕相傾百憂悲
契濶歡懷冷楸枰
田園久蕪穢何乃滯
歸畊澤雉垂飲啄
勞勞爲誰營朝霞信難
久將返葺柴荆

雪蓮上人結茅虎峯

雪公挾竒骨結巢萬松裏
聽濤躍清機對石飲靜
理寒谷遲春風
慙雲頽不起山中久
無人今乃屬之子

輓唵覽大師

一片寒光寂此心無所依
但留千嶂月空誦五言
詩芳躅難爲繼微詮了不疑
越山高峻處仰止見
吾師

立春前三日見籬下白菊始開

霜戰群枝勁凌寒殿雪姿
深心無可語或許梅花

知

蓴冰舫看雨

雨當花發後
怨殺幾多紅
翠濕新開帙
寒禁半吐
叢

棠溪

碧溪吹縹柳花風
點點飛帆落鏡中
野寺數敲鐘
斷後石梁立個釣魚翁

採蓴

一棹烟蓑攬紫英
田田湖上綠千層
拋綸擲釣人

歸去贏得雲峰幾點青

葉之恒

先生諱之恒字公亮智華冢君也自幼茹素奉佛
家傳舍利二顆範金爲塔貯之朝夕頂禮舍利大
如黍子一白一粉紅色歲或放光一二度知者乞
借觀虔懇不已乃拈香叩首請出注淨水於磁甌
中以舍利左右投入光溢水面久之兩舍利漸引
而相迎人爭異之後竟爲黠者竊去璋總角時從
先生於家塾與人言及失舍利事尚懊恨不已以

爲與佛無緣生此魔障耳其課徒也專功記誦規
範頗嚴午課不竟飯至弗食日課未畢夜分不眠
經書背誦務如瓶中瀉水無一些粘滯而後已磨
鍊生徒真若苦行頭陀不肯自暇逸者書學二王
詩不甚作適興矢口都弗存稿璋童時所心記者
纔二首而已

仲冬同諸子登莫釐峰

携筇緩步轉山阿一片閒情發浩歌老樹不堪霜
葉墮塞鴻愁載夕陽過人家野燒迷蒼靄天際晴

峯列碧螺極目白雲連鳥道遲遲待月意如何

六言自警

社燕惟知栖幕夏虫焉可語冰莫逐世情冷暎自
然心少愛憎

葉之倫

之倫字公明智華次子早亡

誦楚詞

叢蘭重叠怨幽暉楚厲迷離淚濕衣巫峽雲深神
女夢湘江雨暗鷓鴣飛山中桂樹幽人宅潭畔行

吟漁父磯日暮哀歌心獨苦驚魂欲傷大招歸

梅花

空山香不絕天縱枝頭雪忽聞碎玉教林下有人折

葉之聲

聲字天聞號鳴一居射鶚山下年弱冠名噪庠序
家有酤坊在金陵歲一往與海內名士遊學日以
進會兩京相繼傾覆遂高隱不仕私心嚮往康節
先生扁其所居室曰小安樂窩茗椀爐烟晨夕嘯

咏其爲詩安雅恬適從容不迫居然有道氣象及
疾革預刻時日以待命諸子書其碣曰明學博某
某之墓

園居春日

菊苗初茁倚籬栽曲逕迂斜半是苔富麗昔年推
沁水淒涼今日話叢臺黃庭讀罷爐煙歇白苧歌
殘山雨來莫笑謀生事全拙先疇猶喜未污萊
布穀催耕處處聞山田雖薄莫辭勤韶光眼底將
三月春色枝頭已十分客散酒醒箋相鶴僧歸茶

熟展鷺群柳塘昨夜添新漲拂面微風縐澱紋
連朝春色甚堪描微雨初晴潤藥苗壯志大都消
趨蘖閒情全副傲漁樵新鶯啞啞嬌歌扇弱柳纖
纖倚舞腰風日正佳同志好看山擬欲上蘭橈
意氣相逢莫盡傾且沽斗酒漫閒評人生何必營
三窟時局真堪對一枰昨日好花難再艷他年青
史不須爭蹉跎莫負韶華老來試新調玉糝羹
到處名山即便留吾生何處不夷猶文難駭俗琴
休碎相不封侯筆莫投賸有釣緡懸竹屋偶攜茶

竈上扁舟辛夷正發山窓下病渴相如已倦遊
不羨江陵千木奴得錢卽付酒家胡朱家一去無
真俠郭解原來只博徒老衲訂期翻貝葉野人相
過饌雕菰春風和煦堪攜杖次第溪山入畫圖
傳聞湖上徧精藍挈榼扶筇恣意探辭以勝遊皆
絕調飲因同契得沉酣漫誇昔日屠龍技且縱今
宵捫虱談欲構一菴容我老笑他托足入終南

感興

颯然兩鬢已成翁往事如雲與夢同童子莫矜能

刻鵠壯夫原不事雕虫難邀俗眼驪黃外孰寄知音
雨雪中何日粗酬塵坩了最高樓上聽松風

偶成

閒居幽事屬田園何必山林始避喧足水旱未分
子母多年修竹長翁孫欣然勝敗無心奕兀爾醉
醒隨意尊昨夜一番微雨過綠波喜漲曲池痕

葉芳嘉

芳嘉字平仲號鷗莊鳴一之子穎悟過人讀書好
古其舅氏湯聖弘勝國名宿也平仲得其指授含

英咀華浸潤磨礪發爲文章原本經史人以爲酷
似其舅莫不以大器期之乃數竒不偶終于青衿
知者惜之有匏瓜集學圃吟行世其未梓者有讀
史論斷二十卷擇雅堂詩選百卷

夏日苦雨和張黃門協

祝融司夏令朱火炳南陸一從羲馭隱寒色映深
竹圓池翻小荷荒圃浸孤菊怪哉暄陽候反令群
物肅幽華不敢滋芳蘭失其馥綠知氣候乖異事
警耳目天運未可知明德當自勗

閒居觀物化義軒不可欺空齋十日卧雨脚散如
絲良友日以遠幽憂日以滋寢興無可適願言懷
所思街衢方淖濘三徑絕履綦荆扉恒晝掩苔綠
上堦基只恐生意盡永失芳菲時
淒風吹廣陌寒氣結重陰潺湲澗溪水浩若江河
深地脉潤朝礎凝雲蔽遙岑自應商羊舞非關傳
說霖惟餘畸士室稍不廢閒吟芳荷猶滴瀝修竹
自蕭森養道有餘致孤懷來好音願將希古志進
此論世心浩歌行當去毋爲坐自沈問誰懷小艸

爲我語幽林

長信怨

憶昔未承恩蛾眉莫言好及當專寵時盡道畫眉
巧今來長信中修眉翻更工君王不時顧雙臉漸
銷紅

讀史

讀史如觀場喜慚在俄頃徒據紙上言其識終坐
井輪扁安在哉何從得要領

讀書

陶公道中庸元氣在天壤杜陵百谷王吐納含萬
象昌黎最晚出獨欲爭雄長瞿瞿儋耳翁其舌長
且廣喟彼渭南老悠然發遐想

閱語錄

拈花惟一笑本不落言詮如何諸老宿競立文字
禪政如蠶入繭吐絲以自纏我欲使一空悉化爲
雲烟

溪上

獨坐水邊磯喧寂兩何有垂綸無所羨釣竿忘在

手人語採菱歸悠然一回首白鷺忽驚飛復下前
溪口

望遠曲

朝辭湘江頭莫宿湘江尾江行不暫停千里復萬
里登高望遠帆日落風烟起環珮鳴空閨洞房冷
如水

初起看月

青天本無月月在幽人心孤光生綠烟澹艷不可
尋坐起當中夜涼露盈衣襟山童有幽夢亦在松

風林

鍾山絕頂作

城居望雙峰陰嵐變晴靄及茲策杖遊氣象果雄
大先登詡捷足屢歇亦匪懈放眼最高頂始覺平
日隘此山若齊楚諸嶺盡陳蔡擴我印壑懷胸次
無芥蒂中峰似龍脊起伏領諸派竒哉數仞石壁
立狀可怪都會偏一隅平江遶如帶遠水忽明滅
又在江影外故老言先朝蔚蔚萬松檜今茲爲童
山興廢殊可慨帝圖既灰寒鴻冢亦蟬蛻吁嗟漢

高魂猶當戀豐沛古今同一盡孰職其成敗何年
將軍墳蔓草亦荒穢落日闐歸樵臨風激天籟

登長干寺塔

晴秋風日佳賈勇試芒屨淒涼帝京餘氣象仍磅
礴層塔矗雲霄巍然煥丹雘楹拱鈎槍梧蔕螭護
榱桷登臨發惆悵屬目驚寥廓煙中百萬家俯視
盡一握群峰互起伏蜿蜒疑龍蟻遙想肇造初般
倂幾揆度壯麗侔皇居經營實天作高皇昔創建
定鼎同卜洛卉服侍郊壇長江自鎖鑰守文貽委

裘謀國效鼂錯同氣忍干矛義士甘鼎鑊哀哉十
族誅至今鬼猶愕何以謝三靈琳宮獨恢拓結構
窮鬼工萬象就繩削六龍時經過十里聞鈴鐸于
焉報佛息童叟咸歡躍藉此日月光一洗兵氣濁
甲子已頻移風流舉非昨殿閣悲黍離冠蓋付營
燭獨有阿育居焜煌照南郭始知佛力尊不與運
會角遙對孝陵巔松栢悉摧劇衰草自淒淒飛雲
仍漠漠

茅山

前山夜來雨殷殷雷始作侵曉化雲英滃然遍高
壑探竒忘盥櫛褰雲命芒屨磴道霾烟嵐層巘勢
崖嶿喬木萬餘株中有飛泉落頗多肥道士恐未
解領略東卿寔治此楊許事猶昨至今三峰頂時
見雙白鶴靈爽無端倪精裡走冥漠童初有真館
仙級庶可學五岳此造端鴻心入寥廓

曉行茅山道中

輿夢續還斷山勢崎復屹野田霧迷漫瀰瀰水光
接羣峰蒼然來松影破微月上方梵唄動廣衢紛

車轍鷄鳴一樣起人心各區別

松下看月

新月涼如水松影亦娟娟遠山微可數林際生空
煙群動一以息幽人猶未還

客至

好風吹客來夕陽催客去樹影東西移視之徒坐
具客稱愛山徙澄澹如山趣此中車馬無胡弗爲
我往

長門曲

吳娃越女皆傾國並入深宮鬪顏色若個蛾眉肯
讓人居然獨在君王側羅衣綽約從風颺風從衣
過生異香迴黃轉綠爭覆手人生得意那可長成
都十樣黛螺小連嬌占盡人間巧願伊承恩且勿
誇不見無數嬌鶯鶯燕方如花

悲歌

小亦不作百夫長大亦不作萬戶侯男兒三十不
得志昂藏空自懸吳鈞吳鈞雖光芒不若控飛鵲
千載麟閣人身後亦寂寞朝持玉東西暮倒金鑿

落酒酣談笑收羗渾歸來仍着登山屨
鷄山鷄山懷古

牝鷄之晨惟家之索鷲鳥累百不如一鷄夫差盛
氣失禽荒強向羽毛分厚薄鷄如宰鷲鷄如胥以
豁誅胥母乃錯鷲去千秋鷄亦無溪山如舊空菰
蒲惟餘石上星星赤似寫萇弘碧血圖

懊儂歌

縹絲軋軋頭緒多鴛鴦拍拍飛帶波門前楊柳已
藏烏郎來不來當語吾

送獨任上人住石頭庵長句

碧峰古有石頭庵石頭蘊公之所住蘊公本出雪
浪門法派相傳非有異吾聞雪浪大導師長于三
秀名尤著雪浪慙山湛懷其徒不乏根器人巢師之講雨
師註巢松浸公一雨潤公皆雪浪之高弟也諸老去今凡幾年古德

門庭誰可繼後賢振起有獨公乃是龍河親法嗣

碧空大師更從靈隱得真宗具德老人不假言銓落文字拈

花擊竹有妙悟吟詩作繪其餘事一杖歸來瓢笠
輕卜廬正得前朝寺古來人地不相待夙世機緣

若符契預知法席當轉盛大慧復興行在是主持
絕學豈敢辭說甚麼石頭路滑不可去

燕子磯觀落照

夾江高岸龍嵒起約束江流若龍尾萬古洪濤春
不移獨砥坤維一何偉百尺孤亭如御風夕陽似
鏡懸晴空澄波不動白于練頃臾化作胭脂紅已
落猶餘半邊赤上天下天同一色萬語嘈嘈爭渡
喧遠浦歸檣呼尤急漁歌杳杳生莫愁孤亭縹緲
不可留我欲乘風一飛去慚無兩翼凌九州歸來

獨向蓬窓倚目光眩掉猶未已娟娟素月照蕪葭
呼起蒙莊誦秋水

舟中對月有懷獨上人山園耕一寶樹

高秋雨過天如藍山容鮮潔無烟嵐獨乘一葉凌
萬頃晶盤海底誰能探斯須圓魄出東嶺照我短
髮風鬢鬢徘徊斗牛江漸白水波激灑流光涵太
陰逢秋金氣盛萬古此理莫可叅空明欲卧失衾
衽蓬窓低小如僧龕自憐野癖戀幽寂涼宵清景
性所貪每逢山水意便住誓欲策杖窮巖嵌揮杯

孤影自相勸輕航恰受人兩三因憶生平素心友
高材一一皆梗楠南宗長老心寂寞屏跡獨臥林
中庵潑墨倪黃在胸次問字往往窮書蟬山人白
首猶作客驚座雄辯生微酣傾囊倒篋出詩卷揚
扞風雅無包含趙子不飲得飲趣腹筍今古皆能
諳吳郎自是著作手下筆有如食葉蠶愛而不見
但搔首樽前誰與持雙柑伊余埋憂惟斗室終歲
誦讀常喃喃書生本不諳世務獻策屢刖誠當慚
側聞萑苻起蜂蠆轉輸不息勞征驂關山幾處尚

擊柝壯士荷甲操戈鏃吾徒貧賤易藏匿婦子止
須石與甌况兼山野性伉直干祿豈徒七不堪強
行將必發狂疾願辭所苦適所甘不如拂衣歸舊
業種菱種秫荒江潭黃冠白足相慰勞棲心匿影
歸瞿眇胸中萬事如轉轂所思曠邈誰堪談扣舷
坐久清露下咄哉此景心猶耽直深酒盡睡不得
一曲自唱烏飛南更持鐵笛叫湘女爲我拂拭雲

中簪

送沈方鄴遊羅浮歌

七十二峯

武山

卷四十七

嶺南山水甲天下風離雨合惟羅浮奇峰四百三
十二石臺窈窕芝房幽朱明古洞神所秘玉書金
簡藏巖取梅花萬樹白如雪古幹偃結疑蛟蚪林
間倒掛多翠鳥參橫月落鳴啾啾丹砂滿地不須
乞葛洪鮑靚終身留今之作者有髯沈策杖過嶺
窮探蒐髯居宛溪今幾載敬亭山色誇梅歐傳家
文武世忠孝讀書萬象供冥搜商歌泠泠中金石
皎若霜月明清秋生平好奇仍嗜險片屐一筇隨
所投茲行夜半看日出層雲盪胸措兩眸鉅公投

卷已盈把一字貴比雙琳球鯁生奚足當贈處亦
玷名字同牛溲感君意氣飲君酒請辦瓢笠從君
游明年決策之五嶽黛烟九點空齊州不然或鼓
太湖柁詩成大笑呼浮邱男兒似此亦不惡焉能
齷齪干王侯髯兮髯兮欲何道飲酣起舞揚清謳
吉祥菴老梅歌

靈谷塢中梅萬樹花光歷亂騰烟霧薄寒流水倚
柴門掩抑空村自朝暮城中何處停遊騃吉祥更
有老梅菴苔痕冷澁繡如鐵銅柯溜雨低僧龕孤

貞不與羣芳偶偃卧欹斜甘老醜靈物猶煩鬼神
護蟉枝直挾蛟龍走眠霜齧雪年復年花時亦放
春風顛黃昏鐘磬長寂寞晴日酒盞還喧闐金陵
名園歌舞地喪亂以來多不記高臺盡圯曲池平
古檜喬松失蒼翠禪扉獨自留竒姿寒葩照眼光
參差看花無語忽惆悵此意遊人知不知

弔五人墓

指鹿謀方稔吹毛令已苛纓冠救同室履尾信危
波大義一朝立英風千載多布衣能死國名字肯

銷磨

發憤捐軀者無如數子竒身非仇俠累塚亦近要
離檜栢風霜肅碑銘日月垂來遊踏黃葉弔古薦
江籬

雨夕秦淮

天意怜佳客清陰愛此宵碧波芳草渡紅袖美人
簫雨氣侵簾幙荷香入酒瓢晚來煙色暝燈火自

迎潮

曉渡

露氣橫江白清光滿釣船好風送微月孤鳥劃空
烟帆影中流見葭菼隔岸連問津吾不記極目但
長天

推枕

推枕覺秋思起看河漢斜鳥驚風在竹人定月當
花節物已如此吾生固有涯關山怨何事長笛起
鄰家

舟中聽雨口占

斷篷滴疎雨孤雁叫深秋此夜扁舟客應添萬斛

愁但能來枕上無不到心頭斷續殘更夢匆匆亦
未休

聞促織

唧唧夜窓冷墻陰暗語幽有懷爭訴月如怨各驚
秋久戍征夫淚寒機思婦愁酒醒欹枕聽淒切亂
更籌

詢蒼舒弟卧病

秋色蒼蒼遠南樓一雁飛以予纔見月知女暫開
扉詩卷閒頻把禽魚興莫違癯姿易憔悴未卜可

勝衣

舟泊觀音門

小艇因涼泊星河落枕前風生兩崖葉月上一江
煙水宿方知夜城居畏有天是時盛暑夢魂無著處秋
信此中偏

初夏園林遲客

園林初夏中鳥語近簾櫳遠樹養深綠孤花存晚
紅梵書徵午夢醺面受微風獨許幽人過應門試
小童

和友人山居雜詩

好卜南村隱知因為買隣菊枝何論晉桃辨已無
秦猿鶴真堪侶雲山不厭貧濁醪猶可辦漉酒借
頭巾

曉思松谿冷含情自覺幽烏啼霜裡月人語竹間
樓歌哭禽言拙褒誅野史留名山如有待天地慰
窮愁

平山閣

山閣凌無地蒼茫島嶼浮遠帆飛極浦緩浪逐輕

鷗覽勝情何亟憑高興轉幽風烟南北渡載盡古今愁

贈張宛邱

聞道彈琴日閒庭對落花以時呼父老細與話桑
麻解綬吟幽壑尋秋上野艇翻嫌勾漏令辛苦覓
丹砂

城南景公方公二祠

舊京宮闕黍離離遺廟雙忠儼在茲千載白虹猶
自亘九原碧血至今垂能教俗慕無窮義力與天

爭已定時俎豆不隨朝市改夕陽弔古有餘思

奉輓前給諫萊陽姜貞毅先生

先生諱塚字如農萊陽人崇禎辛未進士
官禮科給事中以論列權相某諸不法事
下詔獄拜廷杖者三甲申二月遣戍宣州
衛甫出國門卽有鼎湖之變先生終不歸
故鄉流寓吳門垂三十年將卒命其子曰
必葬我敬亭之麓終君命也既易簣嗣子
奉治命往窆焉門人私謚曰貞毅先生友

人沈方鄴泌先生門下士也來徵輓詩敬

賦二章

聞說先朝有直臣青蒲毆血事酸辛尚方一劍平生志園土三年未死身變姓久同吳市卒荷戈終作敬亭人

先生寫小照題曰荷戈圖自稱曰宣州老軍

白衣會葬哀歌

發古道于今誼轉親

漢臣折檻諫書存國是當年未可論血杖至今猶膽落赭衣終老是君恩賜環望絕心徒苦易箆歌成道愈尊荆棘銅駝多少恨孤忠何用更招魂

送黃俞邵再奉 詔入史館

重把離觴話夕曛先朝近事易紛紜神熹以後尤多故朝野之間頗異聞慎重傳疑成信史折衷持正發高文三長並擅應無忝衮衮千秋定屬君

鳳凰臺置酒有懷李白

衰草蒼茫雉堞平一杯何處酌秋清村環老圃踈籬晚寺對寒山夕雨晴天寶亂來無賦草夜郎遷後剩詩名風流寂寞荒原在夜夜啼烏遠鳳城

重遊靈谷

石磴憑虛拾級登昔人何代此傳燈導泉世外僧
經濟伐木山中寺廢興龍虎氣衰空定鼎林泉夢
稔懶扶藤悲歌幾處堪頭白一片斜陽是孝陵

夏日道中書所見

行盡烟墟又鹿場江雲斷處稻雲黃諸峰似髻參
差出官道如弦宛轉長蟬弄葉風翻古寺犢依柳
影卧方塘桔槔不信耕夫苦汗滴禾根背夕陽

梅花

孤山回首是耶非剌水殘山可息機疎雨滴簷春

事早軟風吹雪夜香微佳尋有客同移棹僵卧何
人獨掩扉料得鏤冰還覓句病來詩骨不堪肥
野夫何不棄儒冠澗曲山阿賦考槃破涕只因憐
骨立悲歌應已識心酸久拚疎雨荒烟裏長在孤
舟野水灘冷蘂不隨攀折盡頓令驛使悔征鞍
兀坐書空意未寧偶來花底註茶經月臨瘦影寒
相向露挹繁枝素有馨去國帆低春水渡采香人
悵夕陽亭可憐知己無多在應被時人笑獨醒
自有高懷許陸沉入山何事不能深欹橋水淺垂

垂合滑路人稀策策尋茅屋數間時抱膝野雲一
片自成陰樵歌欲歇衙門閉搖落偏知感素心

無題和韻

從他粉黛有三千傾國須教見始憐容色似花還
似月夢魂如雨復如煙浴餘小立窺來久粧罷微
吟喚不前記得並肩私語際星河不動影娟娟
天上迢迢十二城悞人仙級是梁清來從碧落期
難準話到銀河妬亦生枕淚有痕羞薄倖鬢絲無
計諱多情夜涼月白天如水猶傍花陰學弄笙

縹緲曾經弱水遊藐姑宛在水中洲也知洞府難
重到賴是神仙不解愁萬樹落紅溪口渡千山罨
畫雨中樓低徊莫話驂鸞夕荇葉菱花一片秋

戊申四月奉旨祭孝陵都人士皆得縱觀

余亦與焉目睹盛典敬賦一章

火德移三統橋山峙一隅風雲空想像日月自馳
驅異代明禋歇興王禮數殊禁臣來上苑寶冊
出天都拜起煩冠劍紛陳用史巫大庖盈簋簋雅
樂飭笙竽憶昔規模遠安知運會徂守衛熊虎立

當殿鬼神趨勛置蕭曹從親將魯衛俱朝光浮玉
 雁夜氣識金鳧請隧猶聞晉藏鈎忽去吳燒痕殘
 鳥道艸色隱龜趺月出非原廟春遊半鼎湖牧兒
 常睥睨野老獨踟躕復見千官集欣聞萬歲呼白
 頭宮監在盼蠻託靈符

芙蓉湖夜泊八韻

木脫鴉如葉香銷月在衾波圍七里郭舟聚五方
 音歲月移人事冰霜見客心故園千種菊鄉思萬
 家砧道路行逾遠庭闈夢自深親衰尤念子愁至

卽盈襟意氣還如昨頭顱漸不禁翻飛驚宿鳥把
 盞一沉吟

花落

曉來片雨過燕語閒花落君莫訴春風春風不中
 託

竹月

琴音不出林片月來相矚見此竹中人鬚眉盡皆
 綠

月下獨酌

蟾蜍入深杯蟋蟀共我語清光如佳人孤意誰能
取

長干行

君家長千里妾住石城邊同鄉不識面底事解留
連

擬霓裳曲

太平天子獨風流羯鼓親搗御手柔博得阿姨迴
一笑消他百萬錦纏頭

別有新腔自按圖承恩法部逐番呼分毫拍數休

教悞瞞得花奴怕玉奴

明妃夢回漢宮

莫道春風面未真丹青原不解傳神君王細認妾
顏色可是當年畫裡人

薛夜來

漢水東流去不迴六宮簫鼓在漳臺袁家新婦恩
何在更勅香車迎夜來

春閨怨

燕子歸來客未還但傳征戍在蕭關空閨亦有封

侯夢片枕曾行萬里山

栖霞山中

峰峯凝黛綠生煙萬壑松潮捲到天桂冷月遲香
欲濕一光忽墮艸堂前

高帝斬蛇劍

大澤真人仗輓轡中原尚有橫行無火龍一躍金
精死直取咸陽作帝都

秋宮詞

蟋蟀鳴時枕簟涼疎簾如水月如霜玉階人杳梧

桐靜恩夢不知誰短長

鷓鴣山乘涼似月上人

石浪山根似古槎已公留客進茶瓜微茫一寸波
心塔知是吳江數萬家

咏史

佳令何須負弩迎王孫只合荷鋤畊漢家多少憐
才者不及蛾眉識長卿

歲除有感

燈前笑語愛團圓細雨疎簾夜未闌將母自知慚

阿弟高堂温得錦衾寒

莫釐峰

將軍遺骨此山阿贏得山名永不磨欲覓殘碑無
一字陣雲争似墓雲多

花游曲

夕陽明艷萬枝垂露曉風晴總道宜安得夜深人
去盡看他明月上來時
野老當年手自栽惹教屐齒破蒼苔不知雨打風
吹後可有遊人特地來

葉萬年

萬年字聖俞縣諸生以舌耕為產每有著作多任
天真不暇選言而出落筆縱橫不復收拾存稿寥
寥

雨後月

滴破秋山色空明忽改觀床頭如水白猶帶雨光
寒

自君之出矣

自君之出矣耿耿離愁絆思君如繭絲纏綿不能

斲

葉萬里

萬里號素謙博學能識竒字襟度淵如扣無不應
壯年再試不利遂力于古文辭有震澤諸賦二十
餘篇爲詞壇所稱求其遺稿杳不可得僅于舊屏
幃間得詩二首而已

乙未春送人遊下相

震澤冰初泮黃河水未澌蜚鴻看遍野尺羽正交
馳草暗甘羅宅烟銷項羽祠少年饒意氣四海一

囊詩

題嚴德偉山舟

誰云十乘可移家家在浮鷗水一涯泰華峰頭艤
片玉支機石上訪靈槎月明金粟三珠樹窓映芙
蓉四照花碧眼醉眠書畫舫擬將大瓠扣南華

卷四 賦 蘇 賦 雜 賦 書 畫 賦 琳 瑯 大 殿 賦 南 華
正 文 謝 不 山 姑 寬 琳 凡 即 金 鼎 三 稜 博 宏 如 矣
書 云 上 乘 可 登 寒 室 古 中 湖 木 一 羽 然 華 卒 則 謝
賦 亦 新 賦 山 賦



